

佛本行集經 (節錄)

目犍連！我念往昔有一佛，名示誨幢如來。目犍連！我於彼佛國土之中作轉輪聖王，名曰牢弓，初發道心，種諸善根，求阿耨多羅三藐三菩提。我時供養彼佛世尊，滿一千年……，我設如是諸供養已，晝夜精勤發廣大誓願：

「於當來得作佛時，有諸眾生，不孝父母，不敬沙門及婆羅門，不識家內親疎尊卑，無信敬心，不信三世因緣業果，不信現在有於聖人，無一法行，唯行貪欲、瞋恚、愚癡，具足十惡，唯造雜業無一善事，願我於彼世界之中，當得阿耨多羅三藐三菩提，憐愍彼等諸眾生故，說法教化作多利益，救護眾生，慈悲拔濟令離諸苦，安置樂中，為彼天人廣說於法。」

顯揚聖教論（節錄）

長老憶念。或言聖者憶念。或言鄔波拈耶。我如是名。從今日始發阿耨多羅三藐三菩提心。為欲饒益諸有情故。從今已往凡我所修布施持戒忍辱正勤靜慮及慧。一切皆為證得阿耨多羅三藐三菩提故。我今與諸菩薩摩訶薩和合出家。願尊證知。我是菩薩。」第二第三亦復如是。

瑜伽師地論 卷三十八 (節錄)

云何菩提。

1. 謂略說二斷二智。是名菩提。

二斷者。一煩惱障斷。二所知障斷。

二智者。一煩惱障斷故。畢竟離垢一切煩惱不隨縛智。

二所知障斷故。於一切所知無礙無障智。

2. 復有異門。謂清淨智。一切智。無滯智。

3. 復有異門。謂百四十不共佛法。